



Äntwert vum Minister fir Mobilitéit an öffentlech Aarbechten op d'parlamentaresch Fro n° 7686 vum 1. Mäerz 2023 vum Här Deputéierten Marc Goergen.

Kënnen de Minister oder d'Ministesch bestätegen, dass zënter Méint bekannt war, dass de Bam bannen dra faul war?

Am Géigesaz zu deenen an de Medien duergestallte Fakten, war menges Servicer net bekannt datt op där Plaz eng Gefor géing bestoen. Wann vu menges Servicer am Kader vun hire reegelméisseg Kontrolle festgestallt gëtt, datt ee Stroossebam an engem schlechten Zoustand ass, ginn deementspreechend Mesurë geholl fir d'Gefor duerch de Bam sou séier wéi méiglech z'entschäerfen.

An dem Sënn ass och ze betounen, datt et sech bei dësem Bam em kee Stroossebam gehandelt huet.

Déi spezialiséiert "Équipe d'élagage des arbres" vun der Stroossebauverwaltung, déi den Ënnerhalt vun de Stroossebeem mécht, konnt dëst also net bemierken.

Nieft dem Ënnerhalt vun der "Équipe d'élagage des arbres" ginn och reegelméisseg visuell Kontrolle vun de Cantonieren am Kader vun hirer "Police de la voirie de l'État" gemaach.

Bei dëser Kontrolle gëtt nieft diversen anere Saachen och nom Zoustand vun deenen un d'Strooss ugrenzende Beem gekuckt. Dës Kontroll beinhalt, ënnert anerem, ob de Stamm faul Plazen huet oder och wéi d'Kroun ausgesäit (zum Beispill ob se vill Blieder huet oder net).

Well d'Cantonieren awer keng Experten an dësem Beräich sinn, gëtt am Fall vun engem Zweifel den zoustännege Fieschter vun der Naturverwaltung geruff.

Leider konnt bei dësem Bam mam bloussen A näischt erkannt ginn.

Zousätzlech ass hei och ze bemierken, datt et sech hei ëm ee Lafbam gehandelt huet (eng Esch), deen am Wanter seng Blieder verléiert. Et konnt een also och net direkt un der Kroun erkennen, datt de Bam krank war.

Aus de genannte Grënn konnte vu menges Servicer keng Moosnamen ergraff ginn.

Am Fall wou ee Bam vu baussen eng erkennbar faul Plaz huet oder anescht ze erkennen ass, datt de Bam sech an engem schlechten Zoustand befënnt, gëtt den zoustännege Fieschter vun der Naturverwaltung vun de Cantonieren, déi fir déi Streck responsabel sinn, informéiert. Am Joer 2022 gouf et eleng am Dikrecher Arrondissement 165 Ufroen ("demande d'abattage d'arbre") vun de Cantonieren, déi esou ee faule Bam erkenne konnten, gestallt.

Wiem gehéiert de Bam, vun deem den Aascht ofgebrach ass?

D'Esch vun där den Aascht ofgebrach ass, stoung op engem Domän vum Staat.

Allerdéngs stoung dëse Bam net direkt laanscht d'Strooss, mee e bëssen den Hang erop an engem Bestand vu méi wéi 50 % Lafbam-Arten, deem deementspreechend als Biotop (BK13) geschützt ass.

Onofhängeg dovu, wíem de Bam gehéiert, firwat hu weder d'Gemeng Bäerdref nach Ponts et Chaussées de betraffene Bam am Intérêt vun der öffentlecher Sécherheet ewechmaache gelooss?

Wéi schonn an der viregter Fro duergeluecht, war menges Servicer net bekannt datt de Bam an engem schlechten Zoustand war. An Tëschenzäit ass de Bam natierlech ofgeseet ginn. Erhale gouf just nach 1,50 Meter vum Stamm, deem als Doudholz respektiv Liewensraum vir verschidden Insekten déngt.

De Bam stellt also keng Gefor méi fir d'Foussgänger an d'Automobilisten duer.

Et bleift nach ze soen, datt wéinst der Dréchent déi elo säit fënnef Joer a Lëtzebuerg besteet, d'Esche vun der "Eschtriebfaulnis" oder "Eschtriebsterben" bedrot sinn. Dovu ginn d'Eschen esou geschwächt, datt ee méi heftege Wandstouss duergeet fir se ëmfalen ze loossen.

Lëtzebuerg, de 14. Abrëll 2023.

De Minister fir Mobilitéit an öffentlech Aarbechten

(s.) François Bausch